



11

保土  
5983  
10-7



門保  
號 5983  
卷 10-7



西漢會要卷四十

宋 徐 天 麟 撰

職官十

集議上

議立君

高后四年詔曰皇帝疾久不已不可屬天下其議

代之羣臣頓首奉詔紀本

漢大臣使人迎代王郎中令張武等議皆曰願稱

疾無往中尉宋昌進曰大王勿疑也文紀張武宋昌皆代邸官

故與此議

代王入代邸羣臣上議曰丞相臣平太尉臣勃大將軍臣武御史大夫臣蒼宗正臣郢朱虛侯臣章東牟侯臣興居典客臣揭再拜言云云臣謹請陰安侯頃王后兄仲妻也琅瑯王劉澤也列侯吏二千石議大王高皇帝子宜爲嗣文紀

元平元年昭帝崩亡嗣羣臣議所立咸持廣陵王郎有上書言王不可以承宗廟霍光承皇太后詔召昌邑王既至卽位行淫亂光遂召丞相御史將軍列侯中二千石大夫博士會議未央宮羣臣皆驚愕失色田延年曰今日之議不得旋踵於是議

者皆叩頭曰唯將軍令光與羣臣連名奏王尙書令讀奏曰丞相臣敞等云云臣敞等謹與博士臣霸臣雋舍臣德臣虞舍臣射臣蒼等議當廢太后詔歸賀昌邑光坐庭中會丞相以下議定所立廣陵王已前不用及燕刺王反誅其子不在議中近親唯有皇曾孫光遂與丞相上奏皇太后詔曰可

霍光傳

議儲嗣

文帝元年有司請蚤建太子詔曰其安之有司固請更議不宜上乃許之本紀

成帝召丞相翟方進御史大夫孔光右將軍廉褒  
後將軍朱博皆引入禁中議中山定陶王誰宜爲  
嗣者方進根以爲定陶王宜爲嗣褒博皆如方進  
根議光獨以爲中山王宜爲嗣上以禮兄弟不相  
入廟遂立定陶王爲太子孔光傳

### 議宗廟

高后七年詔曰昭靈夫人太上皇妃也武哀侯宣  
夫人高弟兄姊也號諡不稱其議尊號丞相臣平  
等請尊昭靈夫人曰昭靈后武哀侯曰武哀王宣  
夫人曰昭哀后高后紀

孝景元年詔曰其爲孝文皇帝廟爲昭德之舞以  
明休德其與丞相列侯中二千石禮官具禮儀奏  
丞相臣嘉等謹議世功莫大於高皇帝德莫盛於  
孝文皇帝高帝廟宜爲帝者太祖之廟孝文皇帝  
廟宜爲帝者太宗之廟制曰可景紀

宣帝卽位詔丞相御史曰孝武廟樂未稱其與列  
侯二千石博士議於是羣臣大議庭中皆曰宜如  
詔書長信少府夏侯勝勝曰不宜立廟樂公卿共  
難勝曰此詔書也勝曰詔書不可用也於是丞相  
義御史大夫廣明劾奏勝非議詔書毀先帝不道

下獄有司遂請尊孝武帝廟爲世宗廟奏盛德文始五行之舞

夏侯勝傳

本始元年詔曰故皇太子在湖未有號諡歲時祠其議諡置園邑

本紀

元帝時貢禹奏言古者天子七廟今孝惠孝景廟皆親盡宜毀及郡國廟不應古禮天子是其議永光四年乃下詔先議罷郡國廟其與將軍列侯中二千石二千石諸大夫博士議郎議丞相元成御史大夫鄭宏太子太傅嚴彭祖少府歐陽地餘諫大夫尹更始等七十人皆曰宗廟在郡國宜亡修

臣請勿復修奏可因罷郡國廟後月餘復下詔曰祖宗之廟不敢自顯其與將軍列侯中二千石二千石諸大夫博士議元成等四十四人奏議以爲高帝宜爲帝者太祖之廟世世不毀承後屬盡者宜毀今宗廟異處昭穆不序宜入就太祖廟而序昭穆如禮大司馬車騎將軍許嘉等二十九人以爲孝文宜爲帝者太宗之廟廷尉忠以爲孝武宜爲世宗之廟諫大夫尹更始等十八人以爲皇考廟非正禮宜毀於是上重其事依違者一年乃下詔曰云云其正禮儀元成等奏曰祖宗之廟世世

不毀繼祖以下五廟而迭毀云云奏可後歲餘元  
成薨匡衡爲丞相上詔問衡議欲復之衡深言不  
可久之遂盡復所罷寢廟園皆修祀如故哀帝卽  
位丞相光大司空武奏言迭毀之次當以時定臣  
請與羣臣雜議奏可於是光祿勳彭宣詹事滿昌  
博士左咸等五十三人皆以爲繼祖宗以下五廟  
而迭毀孝武皇帝親盡宜毀太僕王舜中壘校尉  
劉歆議以七廟言之孝武皇帝未宜毀上覽其議  
而從之制曰太僕舜中壘校尉歆議可至平帝元  
始中大司馬王莽奏皇考廟本不當立又南陵雲

陵園陵名未正謹與大司徒竄等百四十七人議  
請皇考廟毀勿修罷南陵雲陵爲縣奏可

韋元成傳

### 議郊祀

孝文十五年黃龍見於成紀上乃下詔議郊祀

紀本

元狩二年天子郊雍詔曰今上帝朕親郊而后土  
無祀則禮不答也有司與太史令談祠官寬舒等  
議云云於是天子遂東立后土祠如寬舒等議

志

李延年以好音見上善之下公卿議曰民間祠有  
鼓舞樂今郊祀而無樂豈稱乎公卿曰云云

同上

成帝初卽位丞相衡御史大夫譚奏言甘泉泰畤河東后土之祠宜可徙置長安願與羣臣議定奏可大司馬車騎將軍許嘉等八人以為宜如故右將軍王商博士師丹議郎翟方進等五十人以為宜徙於是衡譚奏議曰今議者五十八人其五十人言當徙八人以為不宜宜於長安定南北郊天子從之同上

平帝元始五年大司馬王莽奏臣謹與太師孔光長樂少府平晏大司農左咸中壘校尉劉歆太中大夫朱陽博士薛順議郎國由等六十七人議皆曰宜如建始時丞相衡等議復長安南北郊奏可後莽又奏言臣謹與太師光大司徒宮羲和歆等八十九人議皆曰宜令墜祗稱皇墜后祗兆曰廣時奏可同上

議典禮

文帝十五年使博士諸生刺六經中作王制謀議

巡狩封禪事郊祀志

武帝建元元年議立明堂本紀又見申公傳

元朔元年詔曰朕欲詔執事興廉舉孝今或至闔郡而不薦一人其與中二千石禮官博士議不舉

西漢會要卷四  
九  
者罪

紀本

五年詔太常其議予博士弟子員丞相宏謹與太常臧博士平等議曰云云

儒林傳序

元鼎四年六月汾陰得寶鼎迎至長安公卿大夫

皆議尊寶鼎天子曰鼎曷爲出哉有司皆言鼎宜

視宗廟藏於帝庭以合明應制曰可

郊祀志下同

自得寶鼎上與公卿諸生議封禪封禪用希曠絕

莫知其儀體而羣儒采封禪尚書周官王制之望

祀射牛事齊人丁公年九十餘對曰云云羣儒旣

已不能辨明封禪事上爲封祠器視羣儒於是盡

罷諸儒弗用

帝議欲放古巡狩封禪之事諸儒對者五十餘人

未能有所定上乃自制儀頗采儒術以文焉褚大

與兒寬議封禪於上前大不能及

兒寬傳

元封七年大中大夫公孫卿壺遂太史令司馬遷

等言歷紀廢壞宜改正朔上乃詔御史大夫寬曰

與博士共議今宜何以爲正朔服色何上寬與博

士賜等議皆曰云云遂詔卿遂遷與侍郎尊大典

星射姓等議造漢歷

律歷志

宣帝時美陽得鼎獻之下有司議多以爲宜薦見



宗廟如元鼎時故事張敞上議曰今此鼎細小不宜薦見於宗廟制曰京兆尹議是郊祀志

石渠論五經同異見圖書條

司隸校尉涓勳奏言丞相請遣掾史以宰士督察

天子奉使命大夫甚諄逆順之理願下中朝特進

列侯將軍以下正國法度議者以為丞相掾不宜

移書督趣司隸翟方進傳

哀帝即位有詔問丞相大司空定陶共王太后宜

當何居光議以為定陶太后宜改築宮大司空何

武曰可居北宮上從武言孔光傳

傅太后欲與成帝母俱稱尊號羣下多順指言宜

立尊號唯師丹與孔光持不可上重違大臣又內

迫傅太后依違者連歲同上

議封建

漢五年詔諸侯王視有功者立以為燕王荆王臣

信等十人皆曰太尉盧縮功最多請立以為燕王

六年詔齊其復以為諸侯及擇寬惠修絜者王齊

荆地韓王信奏請云云

十一年詔王相國通侯吏二千石擇可立為代王

者燕王綰相國何等三十三人皆曰子恆請立以

為代王

詔擇可以為梁王淮陽王者燕王綰相國何等請立子恢為梁王子友為淮陽王

詔王相國擇可立為淮南王者羣臣請立子長為王

十二年詔朕欲復立吳王其議可者長沙王臣等言沛侯濞重厚請立為吳王

詔諸侯王議可立為燕王者長沙王臣等請立子建為燕王

以上並高紀

武帝元狩六年大司馬臣去病請定王子位制曰

下御史丞相臣青翟御史大夫臣湯太常臣充大行令臣息太子少傅臣安行宗正事謹與二千石臣賀等議制曰更議丞相御史謹與列侯臣嬰齊中二千石臣賀諫大夫博士臣安等議曰云云丞相臣青翟御史大夫臣湯昧死言臣青翟等與列侯吏二千石諫大夫博士臣慶等議奏留中不下臣青翟等竊與列侯臣壽成等二十七人議制曰立皇子閔為齊王旦為燕王胥為廣陵王三王世家昌邑王賀薨豫章太守廖奏言宜以禮絕賀以奉天意願下有司議議皆以為不宜為立嗣昌邑王傳

議功賞

漢五年列侯畢已受封奏位次皆曰平陽侯曹參功最多宜第一關內侯鄂千秋時為謁者進曰羣臣議皆誤蕭何當第一曹參次之上曰善乃令何第一何功雖高待鄂君乃得明於是因鄂千秋故所食關內侯邑二千戶封為安平侯蕭何傳

高后二年詔曰欲差次列侯功以定朝位其與列侯議定奏之丞相臣平言謹與絳侯臣勃曲周侯臣商穎陰侯臣嬰安國侯臣陵等議云云奏可本紀馮奉世擊莎車王白殺上甚說下議封奉世丞相

將軍皆曰奉世功效尤著宜加爵土之賞少府蕭望之獨以奉世不宜受封上善望之議馮奉世傳

甘延壽陳湯斬郅支單于既至論功石顯匡衡以為延壽湯擅興師矯制為國招難漸不可開元帝內嘉延壽湯功而重違衡顯之議議久不決故宗正劉向上疏曰宜尊寵爵位以勸有功於是天子下詔曰其赦延壽湯罪勿治詔公卿議封焉議者以為宜如軍法捕斬單于令匡衡石顯以為郅支非真單于元帝取鄭吉故事封千戶衡顯復爭迺封延壽為義成侯賜湯爵關內侯陳湯傳

成帝既罷昌陵以長首建忠策復下公卿議封長  
當又以爲長雖有善言不應封爵之科坐前議不  
正左遷鉅鹿太守後遂封長平當傳

西漢會要卷四十一

西漢會要卷四十一

宋 徐 天 麟 撰

職官十一

集議下

議民政

文帝元年三月詔曰方春和時吾百姓鰥寡孤獨  
窮困之人或阡於死亡其議所以振貸之本紀  
後元年詔曰間者數年比不登其與丞相列侯吏  
二千石博士議之有可以佐百姓者無有所隱同上  
武帝時公孫宏奏言禁民亡得挾弓弩便上下其

議吾邱壽王對曰大不便書奏上以難丞相宏宏

誦服焉吾邱壽王傳

元鼎六年上曰今內史稻田租挈重不與郡同其  
議減令吏民勉農盡地利平繇行水勿使失時溝志

昭帝始元六年二月詔有司問郡國所舉賢良文

學民所疾苦議罷鹽鐵權酤本紀詳見鹽鐵條

元帝時貢禹言宜罷采珠玉金銀鑄錢之官毋復  
以為幣除其販賣租銖之律租稅祿賜皆以布帛  
及穀使百姓壹意農桑議者以為交易待錢布帛

不可尺寸分裂禹議亦寢食貨志下

禹以為宜令民七歲去齒乃出口錢年二十乃算

天子下其議令民產子七歲乃出口錢自此始本傳

成帝建始三年京師民無故相驚言大水至召公

卿議大將軍鳳以為云云羣臣皆從鳳議左將軍

王商獨曰必訛言也上乃止王商傳

有上書言古者以龜貝為貨今以錢易之民以故

貧宜可改幣上以問師丹丹對言可改章下有司

議皆以為行錢以來久難卒變易師丹傳

議法制

孝文二年詔丞相太尉御史今犯法者已論而使無罪之父母妻子同產坐之朕甚弗取其議丞相周勃陳平奏臣之愚計以爲如其故便文帝復曰云云朕未見其便宜熟計之平勃乃曰臣等謹奉

詔刑法志

十三年制詔御史其除肉刑丞相張蒼御史大夫馮敬言臣謹議云云臣昧死請制曰可

刑法志

景帝元年詔吏受所監臨以飲食免重受財物賤買貴賣論輕廷尉與丞相更議著令廷尉信謹與丞相議曰云云

本紀

宣帝時京兆尹張敞上書願令諸有罪皆得以差入穀八郡贖罪事下有司蕭望之與少府李疆議云云於是天子復下其議兩府丞相御史以難問敞敞曰云云疆復對曰不便遂不施敞

議蕭望之傳

哀帝卽位詔曰諸侯王列侯公主吏二千石及豪富民多蓄奴婢田宅亡限其議限制

本紀

議同姓

淮南王長謀反召至長安丞相臣蒼典客臣敬行御史大夫事宗正臣逸廷尉臣賀備盜賊中尉臣福昧死言長當棄市制曰朕不忍致法於王其與

列侯二千石議臣蒼臣敬臣逸臣福臣賀昧死言  
臣謹與列侯吏二千石臣嬰等四十三人議宜論

如法

史記淮南王傳

元胡中肥如令郢人昆弟上書具言燕王定國事

下公卿皆議曰當誅上許之

燕王澤傳

淮南王安反衡山王賜淮南王弟當收坐有司請  
逮捕衡山王上曰諸侯各以其國爲本不當相坐  
與諸侯王列侯議趙王彭祖列侯遜等四十三人  
皆曰云云膠西王端議曰云云丞相宏廷尉湯以

聞本傳

議大臣

始元四年桑宏羊子遷亡過父故吏侯史吳會赦  
吳得自出繫獄廷尉少府雜治反事丞相車千秋  
召中二千石博士會公車門議問吳法明日千秋  
封上衆議大將軍光以千秋擅召中二千石以下  
遂下少府廷尉獄杜延年傳

蕭望之劾奏韓延壽上僭不道又自陳前爲延壽  
所奏今復舉延壽罪衆庶皆以臣懷不正之心侵  
寃延壽願下丞相中二千石博士議其罪事下公  
卿皆以延壽前旣無狀復後誣愬典法大臣欲以

西漢書卷四十一  
解罪狡猾無道竟坐棄市

延壽傳

定陵侯淳于長坐大逆誅長小妻迺始等六人皆以長事未發覺時棄去或更嫁及長事發丞相方進大司空武議迺始等於法無以解請論孔光議以爲不當坐有詔光議是

孔光傳

哀帝初薛宣子況賕客楊明創申咸事下有司御史中丞衆等奏况明皆棄市廷尉以爲完爲城旦上以問公卿議臣丞相光大司空丹以中丞議是自將軍以下至博士議郎皆是廷尉

薛宣傳

哀帝時丞相王嘉上書薦故廷尉梁相等尙書劾

奏嘉言事恣意迷國罔上不道下將軍中朝者議左將軍公孫祿司隸鮑宣光祿大夫孔光等十四人皆以爲嘉應迷國不道法光祿大夫諸吏給事中龔勝獨書議曰嘉迷國不疑今舉相等過微薄日暮議者罷明旦復會左將軍祿問勝君議亡所據今奏當上宜何從勝曰將軍以勝議不可者通劾之遂可光奏光等請詔嘉詣獄制曰驃騎將軍御史大夫中二千石二千石博士議郎衛尉雲等五十人以爲如光等言可許議郎龔等以爲宜奪爵土免爲庶人永信少府猛等十人以爲大臣括



髮關械裸躬就笞非所以重國褒宗廟也有詔假

謁者節召丞相詣廷尉詔獄龔勝王嘉傳

傅太后怨傅喜使孔鄉侯晏風丞相合奏免喜侯

朱博受詔與御史大夫趙元議元博奏請免為庶

人上疑博元承指詔左將軍彭宣與中朝者雜問

宣等劾奏博宰相元上卿晏以外親不忠不道臣

請詔謁者召博元晏詣廷尉詔獄制曰將軍中二

千石二千石諸大夫博士議郎議右將軍矯望等

四十四人以為晏宜與博元同罪罪皆不道上減元死

罪三等削晏戶四分之一假謁者節召丞相詣廷

尉詔獄朱博傳

尉詔獄朱博傳

議邊事

孝文即仁將軍陳武議曰南粵朝鮮宜用征伐孝

文曰朕能任衣冠念不到此且無議軍律書

四年單于遺漢書書至漢議擊與和親孰便公卿

皆曰和親甚便漢許之匈奴傳

景帝時匈奴徐盧等五人降漢上欲侯之周亞夫

曰云云上曰丞相議不可用本傳詳見處降條

武帝時匈奴求和親羣臣議上前博士狄山曰和

親便上問御史大夫張湯湯曰此愚儒亡知張湯傳

元光二年匈奴來請和親上下其議大行王恢議

曰不如勿許御史大夫韓安國議曰不如和親羣

臣議多附安國於是上許和親明年馬邑豪聶壹

言匈奴可誘以利致之上召問公卿大行王恢對

曰擊之便御史大夫安國曰勿擊便恢曰不然擊

之便安國曰不然勿擊便恢曰不然擊之便安國

曰不然勿擊便恢曰不然云云上曰善迺從恢議

韓安國傳

中大夫主父偃盛言朔方地肥饒外阻河內省轉

輸戍漕廣中國滅胡之本也上覽其說下公卿議

皆言不便公孫宏曰云云朱買臣難誑宏遂置朔

方本偃計也主父偃傳

烏孫使使獻馬願得尚漢公主為昆弟天子問羣

臣議許西域傳

太初元年李廣利詣宛取馬二歲人少不足以拔

宛其夏漢亡浞野之兵於匈奴公卿議者皆願罷

宛李廣利傳

帝末年悔征伐之事乃下詔曰乃者以縛馬書徧

視丞相御史二千石諸大夫郎為學者乃至郡屬

國都尉成忠趙破奴等皆以虜自縛其馬不祥甚哉或以爲欲以見疆

西域傳

神爵元年趙充國擊羌虜欲以威信招降罕升及劫掠者解散虜謀微極乃擊之辛武賢奏言云云天子下其書充國令與校尉以下吏士知羌事者博議充國及長史董通年以爲此殆空言非至計也天子下其書公卿議者咸以爲不先破罕升則先零未可圖也上乃拜武賢爲破羌將軍賜璽書嘉納其冊以書敕責充國

趙充國傳

充國上屯田奏奏每上輒下公卿議臣議初是充

國計者什三中什五最後什八有詔詰前言不便者皆頓首服丞相魏相曰後將軍數畫軍策其言常是臣任其計可必用也

趙充國傳

甘露二年匈奴欵塞詔有司議咸曰禮儀宜如諸侯王稱臣昧死再拜位次諸侯王詔曰其以客禮待之位

宣紀

在諸侯王上天子采之

蕭望之傳

初元元年珠崖反

本紀作三年

上與有司議大發軍待

詔賈捐之建議以為不當擊上使侍中王商詰問捐之捐之對奏上以問丞相御史御史大夫陳萬年以為當擊丞相于定國以為捐之議是上乃從之賈捐之傳

甘延壽陳湯上疏斬郅支首及名王以下宜縣頭橐街事下有司丞相匡衡御史大夫繁延壽以為宜勿縣車騎將軍許嘉右將軍王商以為宜縣有詔將軍議是陳湯傳

永光二年隴西羌反詔召丞相韋元成御史大夫鄭宏大司馬車騎將軍王接左將軍許嘉右將軍

馮奉世入議世傳

呼韓邪單于上書願保塞請罷邊備塞吏卒天子令下有司議議者皆以為便郎中侯應習邊事以為不可許上問狀應對奏天子有詔勿議罷邊事

匈奴傳

河平元年匈奴使者伊邪莫演言欲降下公卿議議者或言宜如故事受其降光祿大夫谷永議郎杜欽以為不如勿受對奏天子從之同上

哀帝時單于當來朝遣使言病願朝明年息夫躬上奏以為疑有他變書奏上引見躬召公卿將軍

大議左將軍公孫祿以為躬欲逆詐不可許躬倚

祿曰云云臣與祿異議未可同日語也上曰善乃

罷羣臣獨與躬議息夫躬傳

建平四年單于上書願朝五年上以問公卿公卿

以為可且勿許單于使辭去未發黃門郎揚雄上

書諫天子寤焉召還使者更報單于書而許之匈奴傳

傳

雜錄

元封四年關東流民二百萬口無名數者四十萬

公卿議欲請徙流民於邊以適之上以為石慶老

謹不能與其議乃賜丞相告歸而案御史大夫以

下議為請者萬石君傳

成帝封淳于長平當坐前議不正左遷鉅鹿太守

見上議功賞條

孔光為御史大夫以議不中意左遷廷尉本傳

哀帝時馬宮與丞相御史雜議帝祖母傳太后諡

及元始中王莽發傳太后陵徙歸定陶以民禮葬

之追誅前議者馬宮傳

董仲舒在家朝廷如有大議使使及廷尉張湯就

其家而問之董仲舒傳

趙充國罷就第朝廷每有四夷大議常與參兵謀

問籌策焉本傳

張禹家居以特進為天子師國家每有大政必與

定議本傳

西漢會要卷四十一

番禺王國瑞校

西漢會要卷四十二

宋 徐 天 麟 撰

職官十二

告寧休沐

告歸高紀高祖嘗告歸之田李斐曰休謁之名吉日告歸告凶日寧孟康曰古者名吏休假曰告漢律吏二千石有子告有賜告子告者在官有功最法所當得也賜告者病滿三月當免天子優賜其告賜得帶綬印將官屬歸家治病至成帝時郡國二千石賜告不得歸家至和帝時子賜皆絕師古曰告者請謁之言謂請休耳或謂之謝謝亦告也

至日休吏薛宣傳師古曰冬夏之日至不省官事故休吏

五日洗沐鄭當時傳

郎官五日石慶傳

汲黯為主爵都尉多病病且滿三月上常賜告者數

最後嚴助為請告汲黯傳

故事公卿病輒賜告谷永為大司農病三月有司奏

請免獨卽時免谷永傳

琅邪太守馮野王病滿三月賜告與妻子歸杜陵就

醫藥御史中丞劾奏野王賜告養病而私自便持虎

符出界歸家奉詔不敬杜欽曰竊見令曰吏二千石

告過長安謁不分別予賜今有司以為予告得歸賜

告不得是一律兩科失省刑之意夫三最予告令也

病滿三月賜告詔恩也令告則得詔恩則不得失輕

重之差又二千石病賜告得歸有故事不得去郡亡

著令卽以二千石守千里之地在兵馬之重不宜去

郡將以制刑為後法者則野王之罪在未制令前也

不聽竟免野王郡國二千石病賜告不得歸家自此

始馬奉世傳

郎官故事令郎出錢市財用給文書乃得出名曰山

郎張晏曰山財用之所出故取名焉移病盡一日輒償一沐或至歲

餘不得沐其豪富郎日出遊戲或行錢得善部師古曰郎

官之職各有主部楊惲為中郎將罷山郎移長度大司農以

給財用其疾病休謁洗沐皆以法令從事楊惲傳

孝哀初卽位令博士弟子父母死予寧三年本紀

奉朝請朝朔望

時會朝請宣紀如清日春日朝秋日請

丞相張禹遜位以特進奉朝請

傅喜位特進奉朝請

馮參以列侯奉朝請

杜緩前免太常以列侯奉朝請

關內侯蕭望之給事中朝朔望坐次將軍

萬石君奮歸老於家以歲時爲朝臣

蘇武以著節老臣令朝朔望

久任

孝文時吏居官者或長子孫以官爲氏倉氏庫氏則

倉庫吏之後也其二千石長吏亦安官樂職然後上

下相望莫有苟且之意王嘉傳

武帝卽位數歲爲吏者長子孫居官者以爲姓號平準書

書

孝宣地節二年上始親政事侍中尚書功勞當遷及

有異善至於子孫終不改易本紀

宣帝以爲太守吏民之本也數變易則下不安民知



其將久不可欺罔乃服從其教化循吏傳

黃霸曰數易長吏送故迎新之費及奸吏緣絕簿書盜財物公私耗費甚多皆當出於民黃霸傳

丞相

蕭何曹參公孫賀並十三年

張蒼孝文四年十二月相後元二年八月免凡十五年

陳平孝惠六年相孝文二年薨凡十二年

石慶孝武元鼎五年相太初二年薨凡十年

于定國魏相並九年並百官表

光祿勳

徐自為二十六年 王恬啓二十五年

張武二十三年 周仁十三年

于永十六年並百官表

太僕

夏侯嬰自高帝為沛公時常奉車至孝文八年薨

本傳

廷尉

于定國十七年百官表

大鴻臚

商邱成十二年百官表

大司農

高帝元年執盾襄為治粟內史至孝景後二年大農令惠凡六十五年百官表

中尉

張歐九年百官表

御史中丞

咸宣為御史及中丞者幾二十歲本傳

郎

張釋之為騎郎十年不得調本傳

揚雄為郎給事黃門三世不徙官本傳

尚書

故事尚書以久轉遷孔光傳

太樂

樂家有制氏以雅樂聲律世世在太樂官禮樂志

刺史

故事刺史居部九歲舉為守相朱博傳

郡守

黃霸為潁川八年本傳

張敞為京兆九歲本傳

恩賜

帶劔履上殿入朝不趨

高帝五年奏位次令蕭何第一賜帶劔履上殿人

朝不趨本傳

奏事不名入殿不趨

高帝褒賞元功相國蕭何邑戶既倍又蒙殊禮奏

事不名入殿不趨王莽傳

入殿門不趨殺人不死

高帝欲自擊陳豨周緤泣諫上以為愛我賜入殿

門不趨殺人不死周緤傳

几杖不朝

吳王濞稱疾不朝京師及後使人為秋請上賜吳

王几杖老不朝本傳

孝武元朔二年賜淮南王菑川王几杖毋朝武帝紀師

古曰安志皆父帝諸父列也

天子旌旗

梁孝王武得賜天子旌旗從千乘萬騎出稱警入

言趨本傳

江都易王非以軍功賜天子旗本傳

祭酒

吳王濞賜號為劉氏祭酒見史記荀卿傳注

宣帝以蘇武著節老臣號為祭酒本傳

外繇

卜式持錢二十萬與河南太守以給徙民上乃賜

式外繇四百人本傳

安車駟馬

薛廣德為御史大夫乞骸骨賜安車駟馬黃金六

十斤罷本傳

杜延年為御史大夫乞骸骨賜安車駟馬本傳

永始中左將軍史丹乞骸骨賜安車駟馬歸第本傳

大司空彭宣乞骸骨王莽恨宣求退故不賜安車

駟馬本傳

武庫兵

毋將隆曰漢家邊吏職在距寇亦賜武庫兵皆任

其事然後蒙之本傳

車屏官屬

宣帝以賢良高第揚州刺史黃霸為潁川太守賜

車蓋特高一丈別駕主簿車緹油屏泥於軾前黃霸傳

傳

金金常賜也今但舉其畧

賜張良金百鎰

本傳服虔曰二十四兩曰鎰師古曰秦以鎰名金若漢之論斤也

賜將軍四十金

惠紀晉灼曰凡言黃金真金也不言黃謂錢也食貨志黃金一斤直

錢萬師古曰諸賜言黃金者皆與之金不言黃者一金與萬錢也

宣帝時郡國有治理效輒增秩賜金

循吏傳

常賜

養牛

上尊酒

甲第

奴婢

錢

繪帛

東園祕器

冢地

致仕

萬石君奮以上大夫祿歸老於家以歲時為朝臣

周仁病免以二千石祿歸老

張歐以上大夫祿歸老於家

韋賢七十餘為相地節三年以老病乞骸骨賜黃金

百斤罷歸賜第一區丞相致仕自賢始

薛廣德為御史大夫乞骸骨賜安車駟馬黃金六十

斤罷

杜延年為御史大夫乞骸骨天子優之使光祿大夫

持節賜延年黃金百斤牛酒加致醫藥延年遂稱病

篤賜安車駟馬罷就第

以上並本傳

疏廣疏受父子並為師傅俱上疏乞骸骨上以其年皆老許之加賜黃金二十斤皇太子贈以五十斤公卿大夫故人邑子設祖道供張東都門外送者車數百兩

孝平元始元年令天下吏比二千石以上年老致仕者三分故祿以一與之終其身紀本

龔勝邠漢俱乞骸骨惟元始二年六月庚寅光祿大夫太中大夫耆艾二人以老病罷太皇太后使謁者僕射策詔之曰蓋聞古者有司年至則致事所以恭遜而不盡其力也今大夫年至矣朕愍以官職之事

煩大夫其上子若孫若同產同產子一人大夫其修身守道以終高年賜帛及行道舍宿歲時羊酒衣衾皆如韓福故事所上子男皆除為郎龔勝傳

圖功臣

孝宣甘露三年單于始入朝帝思股肱之美乃圖畫其人於麒麟閣法其形貌署其官爵姓名唯霍光不名凡十一人蘇武傳

大司馬將軍博陸侯姓霍氏霍光傳

衛將軍富平侯張安世本傳

車騎將軍龍雒侯韓增韓信傳

百美書卷六十一

後將軍營平侯趙充國

外戚恩澤侯表

丞相高平侯魏相

丞相博陽侯丙吉

宗正陽城侯劉德

御史大夫建平侯杜延年

少府梁邱賀

太子太傅蕭望之

典屬國蘇武

以上並本傳

初趙充國以功德與霍光等列畫未央宮成帝時西羌有警上思將帥之臣追美充國乃召黃門郎揚雄

即充國圖畫而頌之

趙充國傳

孝平元始四年詔畫祀百辟卿士有益於民者蜀郡

以文翁九江以召父應詔書

召信臣傳

西漢會要卷四十二

西漢會要卷四十三

宋 徐 天 麟 撰

職官十三

改官名

秦兼天下立百官之職漢因循而不革明簡易隨時  
 宜也其後頗有所改百官表上  
 孝景中六年更命廷尉為大理將作少府為將作大  
 匠主爵中尉為都尉長信詹事為長信少府將行為  
 大長秋大行為行人奉常為太常典客為大行治粟  
 內史為大農以大內為二千石置左右內官屬大內



史記  
本紀

孝武太初元年定官名本紀

初漢興襲秦官置丞相御史大夫太尉至武帝罷太尉始置大司馬以冠將軍之號非有印綬官屬也及成帝時何武為九卿建言古者民樸事約國之輔佐必得賢聖然猶則天三光備三公官各有分職今末俗之弊政事煩多宰相之材不能及古而丞相獨兼三公之事所以久廢而不治也宜建三公官定卿大夫之任分職授政以考功效其後上以問師安昌侯張禹禹以為然時曲陽侯王根為大司馬票騎將軍

而何武為御史大夫於是上賜曲陽侯根大司馬印綬置官屬票騎將軍官以御史大夫何武為大司空封列侯皆增奉如丞相以備三公官焉議者多以為古今異制漢自天子之號下至佐史皆不同於古而獨改三公職事難分明無益於治亂是時御史府吏舍百餘區井水皆竭又其府中列柏樹常有野鳥數千棲宿其上晨去暮來號曰朝夕烏烏去不來者數月長老異之後二歲餘朱博為大司空奏言帝王之道不必相襲各繇時務高皇帝以聖德受命建立鴻業置御史大夫位次丞相典正法度以職相參總

西漢書卷之三  
領百官上下相監臨歷載二百年天下安寧今更爲  
大司空與丞相同位未獲嘉祐故事選郡國守相高  
第爲中二千石選中二千石爲御史大夫任職者爲  
丞相位次有序所以尊聖德重國相也今中二千石  
未更御史大夫而爲丞相權輕非所以重國政也臣  
愚以爲大司空官可罷復置御史大夫遵奉舊制臣  
願盡力以御史大夫爲百僚率哀帝從之乃更拜博  
爲御史大夫會大司馬喜免以陽安侯丁明爲大司  
馬衛將軍置官屬大司馬冠號如故事後四歲哀帝  
遂改丞相爲大司徒復置大司空大司馬焉

朱博傳

哀帝元壽二年五月正三公官分職大司馬衛將軍  
董賢爲大司馬丞相孔光爲大司徒御史大夫彭宣  
爲大司空正司直司隸造司寇職事未定帝崩本紀  
初何武爲大司空又與丞相方進共奏言古選諸侯  
賢者以爲州伯書曰咨十有二牧所以廣聰明燭幽  
隱也今部刺史居牧伯之位秉一州之統選第大吏  
所薦位高至九卿所惡立退任重職大春秋之義用  
貴治賤不以卑臨尊刺史位下大夫而臨二千石輕  
重不相準失位次之序臣請罷刺史更置州牧以應  
古制奏可及博奏復御史大夫官又奏言漢家至德

溥大宇內萬里立置郡縣部刺史奉使典州督察郡國吏民安寧故事居部九歲舉為守相其有異材功效著者輒登擢秩卑而賞厚咸勸功樂進前丞相方進奏罷刺史置州牧秩真二千石位次九卿九卿闕以高第補其中材則苟自守而已恐功效陵夷姦軌不禁臣請罷州牧置刺史如故奏可朱博傳

孝平元始四年更公卿大夫八十一元士官位名次及十二州名分界郡國所屬罷置改易天下多事吏不能紀本紀

省官

漢吏員自丞相至佐史凡三十萬二百八十五人官

表上

孝文後六年大旱蝗損郎吏員本紀

孝武損郎員三王世家

孝昭元平元年詔曰者省用罷不急官本紀

戒敕官吏

孝文十二年詔曰吾詔書數下歲勸民種樹而功未興是吏奉吾詔不勤而勸民不明也且吾農民甚苦而吏莫之省將何以勸焉本紀下同

孝景後二年詔曰今歲或不登民食頗寡其咎安在

西漢書卷之三  
四  
或詐偽爲吏吏以貨賂爲市漁奪百姓侵牟萬民縣丞長吏也好法與盜盜甚無謂也其合二千石各修其職不事官職耗亂者丞相以聞請其罪

孝武元狩六年詔曰夫仁行而從善義立則俗易意奉憲者所以導之未明與將百姓所安殊路而擣虐吏因乘勢以侵蒸庶邪今遣博士大等六人循行天下存問鰥寡廢疾及寃失職姦猾爲害野荒治苛者舉奏

孝宣地節四年詔曰朕惟百姓失職不瞻吏或營私煩擾不顧厥咎合甲死者不可生刑者不可息此先帝之所重而吏未稱今繫者或以掠辜若饑寒瘐死獄中何用心逆人道也朕甚痛之其令郡國歲上繫囚以掠笞若瘐死者所坐名縣爵里丞相御史課殿最以聞

元康二年正月詔曰今吏修身奉法未有能稱朕意者朕甚愍焉其赦天下與士大夫厲精更始

五月詔曰獄者萬民之命所以禁暴止邪養育羣生也能使生者不怨死者不恨則可謂文吏矣今則不然用法或持巧心析律二端深淺不平增辭飾非以成其罪奏不如實上亦亡繇知此朕之不明吏之不

西漢會要卷四十三  
五  
稱四方黎民將何仰哉二千石各察官屬勿用此人  
吏務平法或擅興繇役飾廚傳稱過使客越職踰法  
以取名譽譬猶踐薄冰以待白日豈不殆哉

黃龍元年詔曰上古之治君臣同心舉措曲直各得  
其所朕數詔公卿務行寬大順民所疾苦今吏或以  
不禁姦邪爲寬大縱釋有罪爲不苛或以酷惡爲賢  
皆失其中奉詔宣化如此豈不繆哉方今天下少事  
繇役減省兵革不動而民多貧盜賊不止其咎安在  
上計簿具文而已務爲欺謾以避其課三公不以爲  
意朕將何任諸請詔省卒徒自給者皆止御史察計

簿疑非實者按之使直僞無相亂

孝成建始元年詔羣公孜孜帥先百寮輔朕不逮崇  
寬大長和睦凡事恕已毋行苛刻

孝哀元壽元年詔曰朕獲保宗廟不明不敏夙夜憂  
勞未皇寧息惟陰陽不調元元不瞻未睹厥咎婁敕  
公卿庶幾有望至今有司執法未得其中或上暴虐  
假勢獲名溫良寬柔陷於亡滅是故殘賊彌長和睦  
日衰百姓愁怨靡所錯躬乃正月朔日有蝕之厥咎  
不遠在余一人公卿大夫其各悉心勉帥百寮敦任  
仁人黜遠殘賊期於安民陳朕之過失無有所諱

戒貪吏

文帝十三年定律曰吏坐受賕枉法守縣官財物而  
即盜之已論命復有笞罪者皆棄市刑法志

景帝元年詔曰吏受所監臨以飲食免重受財物賤  
買貴賣論輕廷尉與丞相更議著令廷尉信謹與丞  
相議曰吏及諸有秩受其官屬所監所治所行所將  
其與飲食計償費勿論它物若買故賤賣故貴皆坐  
臧為盜沒入臧縣官吏遷徙免罷受其故官屬所將  
監治送財物奪爵為士伍免之無爵罰金二斤令沒  
入所受有能捕告畀其所受臧本紀

後二年詔曰吏發民若取庸采黃金珠玉者坐臧為  
盜二千石聽者與同罪景紀

策免大臣

宣帝五鳳二年策御史大夫蕭望之曰有司奏君責  
使者禮遇丞相亡禮廉聲不聞敖慢不遜亡以扶政  
帥先百僚君不深思陷于茲穢朕不忍致君子理使  
光祿勳惲策詔左遷君為太子太傅授印其上故印  
使者便道之官君其秉道明孝正直是與帥意亡讐  
靡有後言本傳

成帝河平四年左將軍史丹等奏王商位三公爵列

西漢書卷五十三  
十一  
侯親受詔策爲天下師不遵法度以翼國家而回辟  
下媚以進其私執左道以亂政爲臣不忠罔上不道  
甫刑之辟皆爲上戮罪名明白臣請詔謁者召商詣  
若盧詔獄上素重商知匡言多險制曰勿治鳳固爭  
之于是制詔御史蓋丞相以德輔翼國家典領百僚  
協和萬國爲職任莫重焉今樂昌侯商爲丞相出入  
五年未聞忠言嘉謀而有不忠執左道之辜陷于大  
辟前商女弟內行不修奴賊殺人疑商教使爲商重  
臣故抑而不窮今或言商不以自悔而反怨懟朕甚  
傷之惟商與先帝有外親未忍致于理其赦商罪使

者收丞相印綬傳

永始二年策丞相薛宣曰君爲丞相出入六年忠孝  
之行率先百僚朕無聞焉朕旣不明變異數見歲比  
不登倉廩空虚百姓飢饉流離道路疾疫死者以萬  
數人至相食盜賊並興羣職曠廢是朕之不德而股  
肱不良也乃者廣漢羣盜橫恣殘賊吏民朕惻然傷  
之數以問君君對輒不如其實西州隔絕幾不爲郡  
三輔賦斂無度酷吏並緣爲姦侵擾百姓詔君案驗  
復無欲得事實之意九卿以下咸承風指同時陷于  
謾欺之辜咎繇君焉有司法君領職解媢欺之路傷

薄風化無以帥示四方不忍致君于理其上丞相高

陽侯印綬罷歸本傳

永始三年賜左將軍史丹策曰左將軍寢病不衰願歸治疾朕愍以官職之事久留將軍使躬不瘳使光祿勳賜將軍黃金五十斤安車駟馬其上將軍印綬宜專精神務近醫藥以輔不衰本傳

綏和二年賜丞相翟方進策曰皇帝問丞相君有孔子之慮孟賁之勇朕嘉與君同心一意庶幾有成惟君登位于今十年災害並臻民流飢餓加以疾疫溺死關門牡開失國守備盜賊黨起吏民殘賊毆殺良

民斷獄歲歲多前上書言事交錯道路懷姦朋黨相爲隱蔽皆亡忠慮羣下兇兇更相嫉妒其咎安在觀君之治無欲輔朕富民便安元元之念間者郡國穀雖頗孰百姓不足者尙眾前去城郭未能盡還夙夜未嘗忘焉朕惟往時之用與今一也百僚用度各有數君不量多少一聽羣下言用度不足奏請一切增賦稅城郭墮及園田過更算馬牛羊增益鹽鐵變更無常朕旣不明隨奏許可後議者以爲不便制詔下君君去賣酒醪後請止未盡月復奏議令賣酒醪朕誠怪君何持容容之計無忠固意將何以輔朕帥道



羣下而欲久蒙顯尊之位豈不難哉傳曰高而不危所以長守貴也欲退君位尙未忍君其孰念詳計塞絕姦原憂國如家務便百姓以輔朕朕旣已改君其自思彊食慎職使尙書合賜君上尊酒十石養牛一君審處焉

本傳

哀帝建平元年策免大司空師丹曰夫三公者朕之腹心也輔善相過匡率百僚和合天下者也朕旣不明委政于公間者陰陽不調寒暑失常變異屢臻山崩地震河決泉涌流殺人民百姓流連無所歸心司空之職尤廢焉君在位出入三年未聞忠言嘉謀而反有朋黨相進不公之名乃者以挺力田議改弊章示君君內爲朕建可改不疑以君之言博考朝臣君乃希眾雷同外以爲不便合觀聽者歸非于朕朕隱忍不宣爲君受愆朕疾夫比周之徒虛僞壞化寢以成俗故屢以書飭君幾君省過求已而反不受退有後言及君奏封事傳于道路布聞朝市言事者以爲大臣不忠辜陷重辟獲采虛名謗譏匈匈流于四方腹心如此謂疏者何殆謬于二人同心之利焉將何以牽示羣下附親遠方朕惟君位尊任重慮不周密懷諛迷國進退違命反覆異言甚爲君恥之非所以

西漢書卷之三  
共承天地永保國家之意以君嘗託傅位未忍考于  
理已詔有司赦君勿治其上大司空高樂侯印綬罷  
歸本

建平二年策大司馬傅喜曰君輔政出入三年未有  
昭然匡朕不逮而本朝大臣遂其姦心咎由君焉其  
上大司馬印綬就第本

策免丞相孔光曰丞相者朕之股肱所與共承宗廟  
統理海內輔朕之不逮以治天下也朕既不明災異  
重仍日月無光山崩河決五星失行是章朕之不德  
而股肱之不良也君前爲御史大夫輔翼先帝出入

八年卒無忠言嘉謀今相朕出入三年憂國之風復  
無聞焉陰陽錯繆歲比不登天下空虚百姓飢饉父  
子分散流離道路以十萬數而百官羣職曠廢姦軌  
放縱盜賊並起或攻官寺殺長吏數以問君君無怵  
惕憂懼之意對無能爲是羣卿大夫咸惰哉莫以爲  
意咎由君焉君秉社稷之重總百僚之任上無以匡  
朕之闕下不能綏安百姓書不云乎毋曠庶官天工  
人其代之於虐君其上丞相博山侯印綬罷歸本  
策左將軍彭宣曰有司數奏言諸侯國人不得宿衛  
將軍不宜典兵馬處大位朕唯將軍任漢將之重而

子又前取淮陽王女婚姻不絕非國之制使光祿大夫曼賜將軍黃金五十斤安車駟馬其上左將軍印綬以關內侯歸家

本傳

策免大司空何武曰君舉錯煩苛不合眾心孝聲不聞惡名流行無以率示四方其上大司空印綬罷歸

就國

本傳

建平三年詔御史大夫王崇曰朕以君有累世之美故踰列次在位以來忠誠匡國未聞所繇反懷詐諛之辭欲以攀救舊姻之家大逆之辜舉錯專恣不遵法度亡以示百僚左遷爲大司農

王上曰傳

哀帝元壽二年冊免大司馬丁明曰前東平王雲貪欲上位祠祭祝詛雲后舅伍宏以醫待詔與校祕書郎楊賜結謀反逆禍甚迫切賴宗廟神靈董賢等以聞咸伏其辜將軍從弟侍中奉車都尉吳族父左曹屯騎校尉宣皆知宏及栩丹諸侯王后親而宣除用丹爲御屬吳與宏交通厚善數稱薦宏宏以附吳得興其惡心因醫技進幾危社稷朕以恭皇后故不忍有云將軍位尊任重旣不能明威立義折消未萌又不深疾雲宏之惡而懷非君上阿爲宣吳反痛恨雲等揚言爲羣下所寃又親見言伍宏善醫死可惜也

西漢書卷之三十三  
三  
賢等獲封極幸嫉妒忠良非毀有功於戲傷哉蓋君親無將將而誅之是以季友鳩叔牙春秋賢之趙盾不討賊謂之弑君朕閱將軍陷于重刑故以書飭將軍遂非不改復與丞相嘉相比令嘉有依得以罔上有司致法將軍請獄治朕惟噬膚之恩未忍其上驃騎將軍印綬罷歸就第

董賢傳

哀帝崩王莽使謁者以太后詔卽闕下策董賢曰聞者以來陰陽不調菑害並臻元元蒙幸夫三公鼎足之輔也高安侯賢未更事理爲大司馬不合眾心非所以折衝綏遠也其收大司馬印綬罷歸就第

董賢傳

哀帝崩彭宣上書願上大司空長平侯印綬乞骸骨

歸鄉里埃寘溝壑莽白太后策宣曰惟君視事日寡功德未効迫于老眊昏亂非所以輔國家綏海內也使光祿勳豐策詔君其上大司空印綬便就國

彭宣傳

元始中莽以太皇太后詔賜太師大司徒馬宮策曰太師大司徒扶德侯上書言前以光祿勳議故定陶共王母諡曰婦人以夫爵尊爲號諡宜曰孝元傅皇后稱渭陵東園臣知妾不得體君卑不得敵尊而希指雷同詭經辟說以惑誤上爲臣不忠當伏斧鉞之誅幸蒙灑心自新又令得保首領伏自惟念入稱四

輔出備三公爵爲列侯誠無顏復望闕廷無心復居  
官府無宜復食國邑願上太師大司徒扶德侯印綬  
避賢者路下君章有司皆以爲四輔之職爲國維綱  
三公之任鼎足承君不有鮮明固守無以居位如君  
言至誠可聽惟君之惡在灑心前不敢文過朕甚多  
之不奪君之爵邑以著自古皆有死之義其上太師  
大司徒印綬使者以侯就第馬宮傳

西漢會要卷四十三

西漢會要卷四十四

宋 徐 天 麟 撰

選舉上

賢良方正

茂材異等附

孝文二年詔曰乃十一月晦日有食之二三執政舉

賢良方正能直言極諫者以匡朕之不逮

十五年詔諸侯王公卿郡守舉賢良能直言極諫者

上親策之傅納以言

孝武建元元年詔丞相御史列侯中二千石二千石

諸侯相舉賢良方正直言極諫之士

元光元年五月詔賢良曰賢良明于古今王事之體受策察問咸以書對朕親覽焉于是董仲舒公孫宏等出焉以上並本紀

五年復召賢良文學

公孫宏傳

孝昭始元元年閏月遣故廷尉持節行郡國舉賢良五年六月詔令三輔太常舉賢良各二人

孝宣本始四年四月郡國地震詔令三輔太常內郡國舉賢良方正各一人

地節三年詔令內郡國舉賢良方正可親民者

十月詔曰迺者九月地震朕甚懼焉有能箴朕過失及賢良方正直言極諫之士以匡朕之不逮毋諱有司

神爵四年四月令內郡國舉賢良可親民者各一人

孝元初元二年三月詔曰乃二月戊午地震于隴西郡丞相御史中二千石舉茂材異等直言極諫之士永光二年三月日有食之詔令內郡國舉賢良直言之士各一人

孝成建始二年二月詔三輔內郡舉賢良方正各一人

建始三年十二月日蝕地震詔丞相御史與將軍列

侯中二千石及內郡國舉賢良方正能直言極諫之

士詣公車朕將覽焉以上並本紀

上盡召直言之士詣白虎殿對策杜欽傳

元延元年七月詔曰迺者日蝕星隕今孛星見東井

公卿大夫博士議郎以經對與內郡國舉方正能直

言極諫者各一人師古曰令公卿與內郡國共舉

孝哀元壽元年正月日有蝕之詔公卿大夫其與將

軍列侯中二千石舉賢良方正能直言者各一人以上並本紀

### 茂材異等

武帝初即位轅固復以賢良徵固老罷歸之轅固傳

武帝即位招賢良文學之士是時公孫宏年六十以

賢良徵為博士使匈奴還報不合意上怒以為不能

宏乃移病免歸元光五年復徵賢良菑川國復推上

宏宏謝曰前已當西用不能罷願更選國人固推宏

宏至太常對策時對者百餘人太常奏宏第居下策

奏天子擢宏對為第一本傳

武帝舉方正賢良文學材力之士待以不次之位東方

朔傳

建元元年丞相綰奏所舉賢良或治申商韓非蘇秦

張儀之言亂國政請皆罷奏可武帝紀

孝元舉茂才富平侯張勃舉陳湯湯待遷父死不葬

喪司隸奏湯無循行勃選舉故不以實坐削戶二百

會薨因賜諡曰繆侯湯下獄論陳湯傳

何武為京兆尹坐舉方正所舉者召見槃辟雅拜武

坐左遷楚內史木傳

### 博士弟子

武帝元朔五年為博士官置弟子五十人復其身太

常擇民年十八以上儀狀端正者補博士弟子郡國

縣官有好文學敬長上肅政教順鄉里出入不悖所

聞合相長丞上屬所二千石二千石謹察可者常與

計偕詣太常得受業如弟子一歲皆輒課能通一藝

以上補文學掌故缺其高第可以為郎中太常籍奏

即有秀才異等輒以名聞其不事學若下材及不能

通一藝輒罷之而請諸能稱者以治禮掌故以文學

禮義為官遷留滯請選擇其秩比二百石以上及吏

百石通一藝以上補左右內史大行卒史比百石以

下補郡太守卒史皆各二人邊郡一人先用誦多者

不足擇掌故以補中二千石屬文學掌故補郡屬備

員請著功令它如律令制曰可儒林傳



張湯請博士弟子治尚書春秋補廷尉史本傳

平帝時王莽增元士之子得受業如弟子勿以為員

歲課甲科四十人為郎中乙科二十人為太子舍人

丙科四十人補文學掌故儒林傳

兒寬以郡國選詣博士受業孔安國

文翁選郡縣小吏十餘人遣詣京師受業博士

終軍選為博士弟子至府受遣

蕭望之以合詣太常受業以上並本傳

唐生褚生應博士弟子選詣博士王式傳

成帝時伏湛以父任為博士弟子本傳

山陽侯張當居坐為太常擇博士弟子故不以寔完

為城旦功臣表下

### 試學童

漢興蕭何草律曰太史試學童能諷書九千字以上

迺得為史又以六體試之課最者以為尚書御史

書令史吏民上書字或不正輒舉劾藝文志

### 射策

武帝立五經博士開弟子員設科射策勸以官祿儒林

傳贊師古曰射策者謂為問難疑義書之於策量其

大小置為甲乙之科列而置之不使彰顯有欲射者

隨其所取而釋之以知優劣射之言投射也

何武王嘉馬宮翟方進皆以射策甲科為郎

房鳳以射策乙科為太史掌故

匡衡射策甲科以不應令除為太常掌故調補平原

文學

兒寬詣博士受業以射策為掌故以功次補廷尉文

學卒史並本傳

明經

龔遂以明經為官本傳

袁良舉明經為太子舍人袁安傳

孔安國貢禹夏侯勝張禹並以明經為博士

睦宏翟方進以明經為議郎

召信臣以明經甲科為郎並本傳

明法

鄭崇父賓以明律令為御史

薛宣以明習文法詔補御史中丞並本傳

治劇

何並陳遵皆舉能治劇為令

尹賞舉能治劇徙頻陽令

原涉舉能治劇為谷口令並本傳

異科

元封五年名臣文武欲盡詔令州郡察吏民有茂材異等可為將相及使絕國者

孝昭始元五年詔舉郡國文學高第各一人

昭紀

元鳳元年賜郡國所選有行義者涿郡韓福等五人帛人五十匹遣歸

孝宣本始元年地震詔內郡國舉文學高第各一人地節二年詔郡國舉孝弟有行義聞于鄉里者各一人

元康元年詔博舉吏民厥身修正通文學明于先王之術宣究其意者各二人中二千石各一人

元康四年詔遣大中大夫循行天下舉茂材異倫之士

孝元初元二年詔丞相御史舉天下明陰陽災異者各三人

永光元年詔丞相御史舉質樸敦厚遜讓有行者

建昭四年臨遣諫大夫博士循行天下舉茂材特立之士

孝成河平四年二月日有蝕之遣光祿大夫博士行舉瀕河之郡舉惇厚有行能直言之士

陽朔二年奉使者不稱詔丞相御史其與中二千石

二千石雜舉可充博士位者使卓然可觀  
鴻嘉二年詔舉敦厚有行義能直言者冀聞切言嘉  
謀匡朕之不逮

永始三年正月日有蝕之臨遣大中大夫循行天下  
與部刺史舉惇樸遜讓有行義者各一人

元延元年詔曰迺者日蝕星隕北邊二十二郡舉勇  
猛知兵法者各一人

以上並  
本紀

哀帝初平當奏宜博求能浚川疏河者下丞相孔光  
大司空何武奏請部刺史三輔三河宏農太守舉吏  
民能者莫有應書

滿漁  
志

建平元年詔其與大司馬列侯將軍中二千石州牧  
守相舉孝弟惇厚能直言通政事延于側陋可親民  
者各一人

建平四年詔將軍中二千石舉民兵法有大慮者

並  
本紀

元壽元年下詔曰天下雖安忘戰必危將軍與中二  
千石舉明習兵法有大慮者各一人將軍二人詣公

車

急夫  
躬傳

哀帝時有詔舉太常

何武  
傳

哀帝崩太后詔有司舉可大司馬者

何武  
傳

西漢書要卷四十四  
八  
孝平元始元年五月日有蝕之公卿將軍中二千石  
舉敦厚能直言者各一人

元始二年秋舉勇武有節明兵法郡一人詣公車冬  
中二千石舉治獄平歲一人

元始五年徵天下通知逸經古記天文厯算鍾律小  
學史篇方術本草及以五經論語孝經爾雅教授者  
在所為駕一封軺傳遣詣京師至者數千人並本紀

### 聘召名士

高帝十一年二月詔曰賢士大夫有肯從我遊者吾  
能尊顯之其有意稱明德者必身勸為之駕遣詣相

國府署行義年有而弗言覺免年老癯病勿遣本紀

武帝即位枚乘年老迺以安車蒲輪徵乘枚乘傳

建元元年遣使者束帛加璧安車以蒲裹輪駕駟迎

魯申公弟子二人乘軺傳從以本紀傳修

元光五年徵吏民有明當時之務習先聖之術者縣

次續食令與計偕師古曰令所徵之人與上計者俱來而縣次給之食

元狩六年詔遣博士分循行天下舉獨行之君子徵  
詣行在所士有特招使者之任也詳問隱處亡位者

舉奏以上並本紀

夏侯勝善說禮服召為博士

疏廣明春秋家居授教徵為博士

以上並本傳

昭帝時涿郡韓福以德行徵至京師賜策書束帛遣

歸詔曰朕聞勞以官職之事其務修孝弟以教鄉里

行道舍傳舍縣次具酒肉食從者及馬長吏以時存

問常以歲八月賜羊一頭酒二斛不幸死者賜復衾

一祠以中牢

兩龔傳

翼奉元帝初卽位諸儒薦之徵待詔宦者署

本傳

貢禹以明經潔行著聞徵為博士曰陛下過意徵臣

臣賣田百畝以供車馬

本傳

孝哀召龔勝為諫大夫勝薦龔舍寧壽侯嘉有詔皆

徵勝曰竊見國家徵醫巫常為駕徵賢者宜駕上曰

大夫乘私車來邪勝曰唯唯有詔為駕

本傳

西漢會要卷四十四

西漢會要卷四十五

宋 徐 天 麟 撰

選舉 下

舉廉 附 孝廉

孝文十二年詔曰孝悌天下之大順也力田為生之本也廉吏民之表也朕甚嘉此二三大夫之行今萬家之縣云無應令豈寔人情是吏舉賢之道未備也其遺謁者勞賜孝者帛人五匹悌者力田二匹廉吏二百石以上率百石者三匹 師古曰自二百石以上每百石加三匹也 孝景後二年詔曰其唯廉士寡欲易足今訾算十以

上乃得官廉士算不必眾有市籍不得官亡訾又不  
得官朕甚愍之訾算四得官亡令廉士久失職貪夫  
長利

孝武元光元年冬初令郡國舉孝廉各一人並本紀

董仲舒曰臣愚以為使諸列侯郡守二千石各擇其  
吏民之賢者歲貢各二人故州郡舉茂材孝廉皆自  
仲舒發之本傳

元朔元年冬詔曰朕深詔執事興廉舉孝今或至闔  
郡而不薦一人其與中二千石禮官博士議不舉者  
罪有司奏議曰不舉孝不奉詔當以不敬論不察廉  
不勝任也當免奏可本紀

孝宣黃龍元年詔曰舉廉吏誠欲得其真也吏六百  
石位大夫有罪先請秩祿上通足以效其賢材自今  
以來毋得舉本紀韋昭曰吏六百石者不得復舉為廉吏也

孝平元始元年令宗室其為吏舉廉佐史補四百石

本紀趙廣漢為平準令察廉為陽翟令

朱博以太常掾察廉補安陵丞

蕭望之察廉為大行治禮丞

薛宣以大司農斗食屬察廉補不其丞



西漢書卷四十五  
光祿勳于永除王嘉為掾察廉為南陵丞復察廉為  
長陵尉

張敞補太守卒史察廉為甘泉倉長

黃霸察廉補河東均輸長復察廉為河南太守丞

尹賞以郡吏察廉為樓煩長

王吉以郡吏舉孝廉為郎並本傳

池陽令舉廉吏獄掾王立薛宣傳

京房以孝廉為郎

師丹孟喜並舉孝廉為郎

劉輔舉孝廉為襄贛令

平當察廉為順陽長並本傳

### 孝弟力田

孝惠四年正月舉民孝弟力田者復其身

高后元年二月初置孝弟力田二千石者一人

孝文十二年三月詔以戶口率置三老孝悌力田常

員令各率其意以導民焉並本紀

### 任子

父任漢儀注吏二千石以上視事滿三歲得任同產若子一人為郎

蘇武以父任為郎

劉向以父任為輦郎

孔光子男放為侍郎

董恭為御史任賢為太子舍人

蕭育以父任為太子庶子

史丹九男皆以丹任為侍中

汲黯以父任為太子洗馬

伏湛以父任為博士弟子

史丹馮野王皆以父任為太子中庶子

杜延年以三公子補軍司空

辛慶忌以父任為右校丞

虎賁諸郎皆父死子代荀綽晉百官表注虎賁諸郎皆父死子代漢制也

兄任

霍去病任光為郎霍光傳

楊惲以忠任為郎

爰盎兄噲任盎為郎中並本傳

族父任

成帝時侯霸以族父任為太子舍人本傳

宗家任

趙兼以淮南王舅侯周陽子由以宗家任為郎成甯傳

致仕

元始二年遣龔勝邴漢策曰其上子孫若同產同

產子一人所上子男皆除為郎龔勝傳

董仲舒曰夫長吏多出於郎中中郎吏二千石子弟

未必賢也本傳

宣帝時王吉上疏曰舜湯不用三公九卿之世而舉

臯陶伊尹不仁者遠今使俗吏得任子弟率多驕驕

不通古今至於積功治人亡益於民此伐檀所為作

也宜明選求賢除任子之令王吉傳

哀帝初即位除任子令本紀

納貨

張釋之以貨為騎郎本傳如淳曰漢注貨五百萬為常侍郎

孝景後二年詔曰今訾算十以上迺得官服虔曰訾

二十七也應劭曰十算十萬也賈人有財不得為吏

廉士無訾又不得官故減至四算得官矣訾與貨同

廉士算不必眾有市籍不得官無訾又不得官朕甚

愍之訾算四得官本紀

司馬相如以訾為郎本傳

董仲舒曰選郎吏又以富訾未必賢也本傳

鬻官

武帝即位干戈日滋財賂衰耗而不贍人物者補官

選舉陵遲廉恥相冒興利之臣自此始也其後府庫

益虛乃募民能入奴婢得以終身復為郎增秩及入

羊為郎始於此其後四年元朔五年置賞官命曰武功爵

大者封侯卿大夫小者郎吏道雜而多端則官職耗

廢元狩四年除故鹽鐵官家富者為吏吏道益雜不選而

多賈人矣元鼎二年始令吏得人穀補官郎至六百石古師

日交更選高官郎又所忠言元鼎三年世家子弟富人或

鬪鷄走狗馬弋獵博戲亂齊民迺召諸犯令相引數

千人命曰株送徒入財者得補郎郎選衰矣宏羊又

請令吏得人粟補官平準書黃霸以待詔入錢賞官補

侍郎謁者坐罪免後復入穀沈黎郡補左馮翊二百

石卒史馮翊以霸入財為官不署右職本傳

方伎

衛綰以戲車為郎事文帝本傳

鄧通以濯船為黃頭郎本傳

周仁以鑿見景帝為太子時為舍人本傳

吾邱壽王年少以善格五召待詔本傳

荀彘以御見侍中史記本傳

武帝時虞初以方士侍祠郊祀志

東郭先生以方士待詔公車史記本傳

武帝即位博開藝能之路悉延百端之學通一伎之

士咸得自効絕倫超奇者為右亡所阿私龜策傳

丞相魏相奏言知音善鼓雅琴者趙定龔德皆召見

待詔王褒傳

伍宏以鑿待詔董賢傳

成帝時言祭祀方術皆得待詔郊祀志

本草待詔郊祀志師古曰以方藥本草而待詔

郡吏

趙禹以佐史補中都官用廉為令史

咸宣以佐史給事河東守

魏相為郡卒史舉賢良

王吉以郡吏舉孝廉為郎

尹齊以刀筆吏稍遷至御史

朱邑少時為舒桐鄉嗇夫遷補太守卒史

鮑宣為縣鄉嗇夫守東州丞

張敞以鄉有秩補太守卒史察廉為甘泉倉長

尹賞以郡吏察廉為樓煩長以上並本傳

焦延壽為郡吏察廉補小黃令京房傳

趙廣漢為郡吏州從事舉茂材

陳萬年為郡吏察舉至縣令

龔勝為郡吏病去官徵為諫大夫

王訢以郡縣吏積功稍遷為被陽令

丙吉為魯獄史積功勞稍遷延尉右監

王尊為獄小吏給事太守府補書佐

尹翁歸為獄小吏除補卒史

于定國為獄史郡決曹補廷尉以上並本傳

上書

武帝初即位詔天下舉方正賢良文學材力之士待

以不次之位四方士多上書言得失自銜鬻者以千

數其不足采者輒報聞罷東方朔傳下同

朔初入長安至公車上書凡用三千奏牘公車令兩

人共持舉其書僅然能勝之人主從上方讀之止輒

乙其處讀之二月迺盡詔拜以為郎史記朔上書曰可

以為天子大臣文辭不遜高自稱譽上偉之令待詔

公車漢書

朱買臣隨上計吏詣闕上書書久不報待詔公車

主父偃元光元年上書闕下朝奏暮召入見是時徐

樂嚴安亦俱上書言世務書奏上召見三人謂曰公

等皆安在何相見之晚也迺拜偃樂安皆為郎中

終軍至長安上書言事武帝異其文拜為謁者給事

中枚臯上書北闕自陳枚乘之子得之大喜召入

西漢會要卷四十五

見待詔並本傳

宣帝初卽位思進賢良多上書言便宜輒下蕭望之問狀高者請丞相御史次者中二千石試事滿歲以狀聞下者報聞或罷歸田里蕭望之傳

元帝初卽位賈捐之上疏言得失召待詔金馬門哀帝初卽位息夫躬上言召待詔並本傳

從軍

周勃材官引疆本傳師古曰疆其兩反服虔曰引疆弓弩官也

申屠嘉以材官蹶張遷為隊率本傳師古曰弩以足蹋者如蹶張

漢興六郡良家子選給羽林期門師古曰六郡謂隴西天水安定北地

上郡西河也以材力為官名將多出焉地理志

公孫賀北地人少為騎士從軍

李廣隴西人以良家子從軍

趙充國隴西人以六郡良家子善騎射補羽林

傅介子北地人以從軍為官

甘延壽北地人以良家子善騎射為羽林

馮奉世上黨人以良家子選為郎並本傳

張次公以勇悍從軍義縱傳

常惠應募隨蘇武使匈奴

鄭吉以卒伍從軍

傅介子斬樓蘭王士刺王者皆補侍郎並本傳

軍功多用超等大者封侯卿大夫小者郎食貨志

選舉雜錄

孝惠高后時市井子孫不得仕官為吏食貨志

有市籍不得官無貲又不得官同上

入財為官不署右職黃霸

宗室不宜典三河劉歆傳

王國人不得宿衛龔勝彭宣

王舅不宜備九卿馮野王馮立馮彥

弟犯法不得宿衛蕭望之

賈人不得為吏哀帝詔

執金吾韓立御史大夫張譚並坐選舉不實免百官表

丞相張蒼任人為中候大為奸利上以為責任敖傳

張勃舉陳湯司隸奏湯亡循行勃選舉故不以實坐

削戶二百陳湯傳

何武所舉方正槃辟雅拜坐左遷楚內史本傳

山陽侯張當居坐為太常擇博士弟子故不以實完

為城旦功臣表

元壽二年大理復梁相坐除吏不次免

河平四年宗正劉順坐使合陽侯舉子免並百官表



西漢會要卷四十五  
建平二年叩成侯王勳坐選舉不以實罵廷史大不

敬免 功臣表

元延元年詔舉方正直言之士紅陽侯立舉陳咸對

策拜為光祿大夫給事中丞相方進奏咸不當蒙方

正並劾立選舉故不以實有詔免咸勿劾立 翟方進傳

嚴延年察獄吏廉有臧不入身坐選舉不實貶秩 本傳

司隸奏杜業為太常選舉不實業坐免官 杜延年傳

平帝初即位詔曰選舉者其歷職更事有名之士則

以為難保廢而弗舉甚謬於赦小過舉賢材之義諸

有臧及內惡未發而薦舉者皆勿案驗令士厲精鄉

進不以小疵妨大才 本紀

西漢會要卷四十五

西漢會要卷四十六

宋 徐天麟 撰

民政一

戶口

自高祖訖於孝平民戶千二百二十三萬三千六十二口五千九百五十九萬四千九百七十八漢極盛

矣地理志師古曰漢之戶口當元始二年最為殷盛故志舉之以為數

京兆尹元始二年戶十九萬五千七百一十二左馮翊戶二萬一千七百七十八

十三萬五千一百一十九右扶風戶二千七百七十八

十一萬七千八百二十二宏農郡戶十一萬八千九百五十四河東戶七千七百七十八

郡 戶二十三萬六千八百九十六 太原郡 戶十六萬  
六十三口六十八 上黨郡 戶七萬三千七百九十八  
萬四百八十八 河南郡 戶二十四萬一千二百四十七  
六 河內郡 戶二十四萬七千九百七十七 河南郡 戶二  
萬六千四百四十四口一 東郡 戶四十七口六百五  
百七十四萬二千四百七十九 東郡 戶四十七口六百五  
萬九千 陳留郡 戶二十九萬六千二百八十八 潁川郡  
戶四十三萬一千四百九十一 汝南郡 戶四十六萬  
口二百二十一萬九百七十三 汝南郡 戶四十六萬  
十七口二百五十九 南陽郡 戶三十六口一百九十四  
萬六千一百四十八 南陽郡 戶三十六口一百九十四  
萬二千 南郡 戶七十二萬五千五百七十九 江夏郡 戶  
五十一萬八千四百七十一 廬江郡 戶十二萬四千三  
十一萬九千二百四十四口一十八 廬江郡 戶十二萬四千三  
百三十三 九江郡 戶十五萬五千二百五十七 山陽郡  
戶十七萬二千八百四十七 濟陰郡 戶二十九萬二千  
八萬六千二百八十八 沛郡 戶四萬九千七百九十九 魏郡 戶一  
百七十八 常山郡 戶十四萬七千九百五十一 魏郡 戶一  
萬二千八百四十九 鉅鹿郡 戶十五萬五千九  
百七十七 清河郡 戶二十萬一千七百七十四 涿郡 戶十九  
六十七口七十八萬五千四百二十二 涿郡 戶十九  
二千七百六十四 勃海郡 戶二十七萬五千七百七十四  
一百一 平原郡 戶十五萬四千三百八十七 千乘  
十九 平原郡 戶十五萬四千三百八十七 千乘  
郡 戶十一萬六千七百二十 濟南郡 戶十四萬七百  
四萬二千八百七十九 泰山郡 戶二十七萬二千八百六  
百八十四 泰山郡 戶二十七萬二千八百六  
戶十五萬四千八百二十六口 北海郡 戶十二萬七  
五十五萬四千四百四十四 北海郡 戶十二萬七

戶十七萬二千八百四十七 濟陰郡 戶二十九萬二千  
口八萬六千二百八十八 沛郡 戶四萬九千七百九十九 魏郡 戶一  
百七十八 常山郡 戶十四萬七千九百五十一 魏郡 戶一  
萬二千八百四十九 鉅鹿郡 戶十五萬五千九  
百七十七 清河郡 戶二十萬一千七百七十四 涿郡 戶十九  
六十七口七十八萬五千四百二十二 涿郡 戶十九  
二千七百六十四 勃海郡 戶二十七萬五千七百七十四  
一百一 平原郡 戶十五萬四千三百八十七 千乘  
十九 平原郡 戶十五萬四千三百八十七 千乘  
郡 戶十一萬六千七百二十 濟南郡 戶十四萬七百  
四萬二千八百七十九 泰山郡 戶二十七萬二千八百六  
百八十四 泰山郡 戶二十七萬二千八百六  
戶十五萬四千八百二十六口 北海郡 戶十二萬七  
五十五萬四千四百四十四 北海郡 戶十二萬七

萬三千一百一十九 **東萊郡** 戶十萬三千二百九十二口 **琅邪**

百五十九 **東海郡** 戶三十五萬八千四百八十四口

郡十口一百一十七萬九千九百六十一口 **臨淮郡** 戶二十六萬八千二百八十八口

百五十五萬九千九百六十一口 **豫章郡** 戶六萬七千四百六十九口

千三百五十七 **會稽郡** 戶二十二萬三千三百三十八口 **丹陽郡** 戶十七萬五千四百一十一口

四 **桂陽郡** 戶二萬八千一百九十九口 **武陵郡** 戶三萬五千一百一十七口

十 **零陵郡** 戶二萬一千九百九十二口 **廣漢郡** 戶七萬七千六百七十九口

百六 **漢中郡** 戶十萬一千五百七十四口 **蜀郡** 戶二十七萬九千四百一十九口

十五 **犍為郡** 戶十萬九千四百一十九口 **越嶲**

千一百七十七口 **益州郡** 戶八萬一千九百九十八口

萬五千七百五十八口 **牂牁郡** 戶四萬八千六百一十九口

七十 **牂牁郡** 戶四萬八千六百一十九口 **巴郡** 戶五萬八千六百一十九口

八 **牂牁郡** 戶四萬八千六百一十九口 **金城郡**

四百九十九口 **牂牁郡** 戶四萬八千六百一十九口

萬二千二百九十九口 **牂牁郡** 戶四萬八千六百一十九口

五千九百九十九口 **牂牁郡** 戶四萬八千六百一十九口

郡四萬八千六百一十九口 **牂牁郡** 戶四萬八千六百一十九口

萬四千六百一十九口 **牂牁郡** 戶四萬八千六百一十九口

六十三 **牂牁郡** 戶四萬八千六百一十九口 **金城郡**

八千六百一十九口 **牂牁郡** 戶四萬八千六百一十九口

十萬八千六百一十九口 **牂牁郡** 戶四萬八千六百一十九口

千五百 **牂牁郡** 戶四萬八千六百一十九口 **金城郡**

六 **牂牁郡** 戶四萬八千六百一十九口 **金城郡**

戶三萬八千六百一十九口 **金城郡**

十四萬九千六百一十九口 **金城郡**

三百四 **金城郡**

九千八百六十九萬朔方郡戶三萬四千三百三十八

八千八百三十六萬朔方郡戶三萬四千三百三十八

八千五百三十三萬朔方郡戶三萬四千三百三十八

千三百三十三萬朔方郡戶三萬四千三百三十八

萬三千二百七十七萬朔方郡戶三萬四千三百三十八

四鴈門郡戶七萬三千一百三十八口代郡戶五萬

百七十一口二十七萬朔方郡戶三萬四千三百三十八

萬八千七百五十四口上谷郡戶三萬六千八百一十

漁陽郡戶六萬八千八百一十口右北平郡戶六萬

百八十九口三十萬朔方郡戶三萬四千三百三十八

二萬七百八十八口遼西郡戶七萬二千六百五十四

十遼東郡戶五萬五千九百七十二口元菟郡戶四

千六百二十二萬樂浪郡戶六萬二千八百四十二口

南海郡戶九萬九千六百一十三口鬱林郡戶四萬二千

五口七萬一千蒼梧郡戶二萬四千三百七十九口

一百六十二萬蒼梧郡戶二萬四千三百七十九口

趾郡戶九萬二千四百四十七口合浦郡戶三萬九千

八口七萬八千九百九十九口日南郡戶三萬九千

千九百八十八口九真郡戶三萬五千七百四十三口

郡戶六萬九千四百六十五口趙國戶八萬四千二百

百五廣平國戶二萬八千五百八十四口真定國戶三

萬七千一百二十六口中山國戶十六萬八千七百

七萬八千六百一十六口中山國戶十六萬八千七百

八千信都國戶六萬五千五百六十六口河間郡戶

萬五千四百三十三口廣陽國戶二萬七百四十八口

萬七千六百六十二口廣陽國戶二萬七百四十八口

百三十一高密國戶四萬五千三百三十一口城陽國

戶五萬六千六百四十二口  
 淮陽國 戶十三萬五千  
 二十萬五千七百八十四  
 九十八萬一千  
 梁國 戶三萬八千七百九十九口  
 東平國 戶十一萬八千四百二十三  
 魯國 戶十五萬六千七百七十九口  
 泗水國 戶八十三萬七千九百七十六  
 楚國 戶十二萬四千七百三十八  
 廣陵國 戶三萬六千七百七十一  
 六安國 戶三萬八千三百四十五口  
 長沙國 戶三萬五千二百一十四  
 萬二千二百五十一  
 萬九千一百一十四  
 二萬九千一百一十四  
 二萬三千四百七十七口  
 三萬五千八百二十五

漢興大城名都民人散亡戶口可得而數裁什二三  
 及至文景四五世間流民既歸戶口亦息高惠文功臣表

孝文即位趨勸農桑減省租賦蓄積歲增戶口寢息

刑法志

文景務在養民武帝贊

孝昭承奢侈餘傲師旅之後海內虛耗戶口減半霍  
 光知時務之要輕繇薄賦與民休息至元始元鳳之

間匈奴和親百姓充實昭帝贊

王成爲膠東相勞來不怠流民自占八萬餘口賜爵  
 關內侯秩中二千石後或言成僞自增加以蒙顯賞

本傳

黃霸爲潁川守戶口歲增治爲天下第一本傳

召信臣爲南陽守百姓歸之戶口增倍本傳

哀平之世百姓貧富雖不及文景然天下戶口最盛

矣食貨志上

### 風俗

凡民函五常之性而其剛柔緩急音聲不同繫水土之風氣故謂之風好惡取舍動靜亡常隨君上之情欲故謂之俗孔子曰移風易俗莫善於樂言聖王在上統理人倫必移其本而易其末此混同天下壹之虛中和然後王教成也漢承百王之末國土變改人民遷徙成帝時劉向畧言其地分丞相張禹使屬潁川朱贛條其風俗猶未宣究故輯而論之終其本末

著于篇地理志序

秦地於天官東井輿鬼之分壘也其界自宏農故關以西京兆扶風馮翊北地上郡西河安定天水隴西南有巴蜀廣漢犍為武都西有金城武威張掖酒泉敦煌又西南有牂柯越巂益州皆宜屬焉漢興立都長安徙齊諸田楚昭屈景及諸功臣家於長陵後世世徙吏二千石高訾富人及豪傑并兼之家於諸陵蓋亦以疆幹弱支非獨為奉山園也是故五方雜厝風俗不純其世家則好禮文富人則商賈為利豪傑則游俠通姦瀕南山近夏陽多阻險輕薄易為盜賊

常爲天下劇又郡國輻湊浮食者多民去本就末列  
侯貴人車服僭上衆庶放效羞不相及嫁娶尤崇侈  
靡送死過度天水隴西山多林木民以板爲室屋及  
安定北地上郡西河皆迫近戎狄修習戰備高上氣  
力以射獵爲先漢興六郡良家子選給羽林期門以  
材力爲官名將多出焉故此數郡民俗質本不恥寇  
盜自武威以西本匈奴昆邪王休屠王地武帝時攘  
之初置四郡以通西域隔絕南羌匈奴其民或以關  
東下貧或以報怨過當或以諄逆亡道家屬徙焉習  
俗頗殊地廣民稀水中宜畜牧故涼州之畜爲天下  
饒保邊塞二千石治之咸以兵馬爲務酒禮之會上  
下通焉吏民相親是以其俗風雨時節穀糴常賤少  
盜賊有和氣之應賢於內郡此政寬厚吏不苛刻之  
所致也巴蜀廣漢本南夷秦并以爲郡土地肥美有  
江水沃野山林竹木疏食果實之饒南賈滇越僮西  
近邛笮馬莩牛民食稻魚亡凶年憂俗不愁苦而輕  
易淫泆柔弱褊阨景武間文翁爲蜀守教民讀書法  
令未能篤信道德反以好文刺譏貴慕權執及司馬  
相如游宦京師諸侯以文辭顯於世鄉黨慕循其迹  
後有王褒嚴遵楊雄之徒文章冠天下繇文翁倡其



教相如爲之師故孔子曰有教亡類武都地雜氏羌  
 及犍爲牂柯越巂皆西南外夷武帝初開置民俗畧  
 與巴蜀同而武都近天水俗頗似焉故秦地天下三  
 分之一而人衆不過什三然量其富居什六秦幽吳  
 札觀樂爲之歌秦曰此之謂夏聲夫能夏則大大之  
 至也其周舊乎自井十度至柳三度謂之鶉首之次  
 秦之分也自魏地至粵地並見地理志不詳錄

西漢會要卷四十六

西漢會要卷四十七

宋 徐 天 麟 撰

民政二

傅籍

景帝二年令天下男子年二十始傅本紀師古曰傅著也言著名籍  
 給公家徭役也天麟按高紀發關中老弱未傅者悉  
 詣軍如涪曰律年二十三傅之疇官高不滿六尺二  
 寸以下爲疲癯漢儀注民年二十三爲正一歲爲衛  
 士一歲爲材官騎士習射御馳戰陳年五十六乃免  
 爲庶民就田里則知漢初民在官三十有三年也今  
 景帝更爲異制令男子年二十始傅則在官三十有  
 六年矣

更役

秦用商鞅之法月為更卒已復為正一歲屯戍一歲

力役三十倍於古師古曰更卒謂給郡縣一月而更者正卒謂給中都官者也率計今

人一歲之中屯戍及力役之事漢興循而未改食董

三十倍多於古也更音工衡反漢興循而未改志董

仲舒更賦昭紀加清曰更有三品有卒更有踐更有

疏更賦過更古者正卒無常入皆當選為之一月

一更是為卒更也貧者欲得顧更錢者次直者出錢

顧之月二千是謂踐更也天下人皆直戍邊三日一

名為更律所謂絲戍也雖丞相子亦在戍邊之調不

可人人自行三日戍又行者當自戍三日不可往便

還因便住一歲一更諸不行者出錢三百入官官以

給戍者是為過更也律說卒踐更者居也居更縣中

五月乃更也後從尉律卒踐更一月休十一月也食

貨志日月為更卒已復為正一歲屯戍一歲力役三

十倍於古此漢初因秦法而行之也

也後遂改易有謫乃戍邊一歲耳

文帝偃武行文丁男三年而一事賈捐之傳如清曰

下民多故三歲而一事

吳以銅鹽故百姓無賦卒踐更輒予平買吳王

漢氏常有更賦罷癡咸出食貨志王莽下合云云晉

昭帝元鳳四年詔三年以前逋更賦未入者皆物收

紀本

鄉役

十里一亭亭有長十亭一鄉鄉有三老有秩嗇夫游

徼三老掌教化嗇夫職聽訟收賦稅游徼循禁賊盜

縣大率方百里其民稠則減稀則曠鄉亭亦如之皆

秦制也百官表漢官儀曰游徼亭長皆習設備五兵

刀持盾被甲設矛戟習射十里一亭亭長亭候五里  
一郵郵間相去二里半司姦盜亭長持二尺板以効  
賊索繩以收執賊

泛役 著外繇並  
雜錄附

惠帝三年發長安六百里內男女十四萬六千人城

長安三十日罷五年復發長安六百里內男女十四

萬五千人城長安三十日罷 本紀  
下同

武帝元狩三年發謫吏穿昆明池 師古曰吏有罪  
者罰而役之

成帝河平元年卒治河者為著外繇六月 溝洫志師  
古曰以卒

治河有勞雖執役日近皆得比  
繇成六月也著謂著于簿籍

後二歲河復決作治六月乃成治河卒非受平賈者

為著外繇六月 溝洫志平賈謂顧也其受  
平賈者不在著外繇之數

哀帝建平二年葬帝太后定陶發陳畱濟陰近郡國

五萬人穿復土 本紀按漢世力役非一姑  
舉此數條以見役法之例

雜錄

文帝時鼂錯說上曰今農夫五口之家其服役者不  
下二人其能耕者不過百晦百晦之收不過百石春  
耕夏耘秋穫冬藏伐薪樵治官府給繇役春不得避  
風塵夏不得避暑熱秋不得避陰雨冬不得避寒凍  
四時之間亡日休息又私自送往迎來弔死問疾養  
孤長幼在其中勤苦如此 食貨  
志上

西邊北邊之郡雖有長爵不輕得復五尺以上不輕

得息賈誼傳

信武侯靳歙坐事國人過律免功臣表師古曰事謂役使之也

復除

從軍

漢二年蜀漢民給軍事勞苦復勿租稅二歲關中

卒從軍者復家一歲高紀下同

五年詔諸侯子在關中者復之十二歲其歸者半

之軍吏卒賜爵非七大夫以下皆復其身及戶勿

事

八年令吏卒從軍至平城及守城邑者皆復終身

勿事

十一年諸縣堅守不降反寇者復租賦三歲

六月令士卒從入蜀漢關中者皆復終身

十二年詔吏二千石入蜀漢定三秦者皆世世復

豐沛

高祖十一年四月令豐人徙關中者皆復終身

十二年以沛為湯沐邑復其民世世無有所與沛

父兄請復豐乃並復豐比沛並本紀

民產子

高祖七年民產子復勿事二歲

紀本

三老

漢二年置鄉三老擇鄉三老為縣三老復勿繇戍

紀本

孝弟力田

惠帝四年舉民孝弟力田者復其身

紀本

武帝元朔元年詔曰朕旅耆老復孝敬

紀本

高年

文帝禮高年九十者一子不事八十者二算不事

賈山傳

武帝建元元年民年八十復二算九十年復甲卒

紀本

四月詔民年九十以上已有受鬻法為復子若孫

令得身帥妻妾遂其供養之事

紀本

邊郡

鼂錯說文帝募民守塞皆賜高爵復其家

紀本

西邊北邊之郡雖有長爵不輕得復

賈誼傳

舊都

文帝三年幸太原復晉陽中都民三歲租

紀本

守冢

高祖十二年詔與秦始皇帝守冢二十家楚魏齊

各十家趙及魏公子亡忌各五家令視其冢復亡

與它事本紀

給祠

武帝登禮中嶽以山下戶凡三百封密高為之奉

邑獨給祠復無有所與郊祀志

宗室

文帝四年復諸劉有屬籍者家無所與本紀

功臣後

宣帝地節二年詔曰博陸侯功德茂盛復其後世  
疇其爵邑世世無有所與

元康元年復高皇帝功臣絳侯周勃等百三十六  
人家子孫令奉祭祀世世勿絕其母嗣者復其次

並本紀

博士弟子

武帝為博士官置弟子五十人復其身儒林傳序

通經

元帝好儒能通一經者復數年以用度不足更為

設員千人儒林傳

車騎馬

鼂錯疏曰令民有車騎馬一匹者復卒三人食貨志

入奴婢

武帝府庫並虛迺募民能入奴婢者得以終身復

食貨志

買復

鼂錯疏曰令民入粟至五大夫乃復一人耳

桑宏羊請令民入粟甘泉各有差以復終身

武帝兵革數動民多買復及五大夫千夫徵發之

士益鮮以上並食貨志

元帝永光三年用度不足民多復除無以給中外

徭役本紀

流民

宣帝地節三年詔流民還歸者且勿算事本紀下同

本始三年大旱三輔民就賤者且毋收事

執喪

宣帝地節四年詔諸有大父母父母喪者勿繇事

使得收斂送終盡其子道本紀

宮人

景帝遺詔出宮人歸其家復終身本紀

節婦

平帝復貞婦鄉一人本紀





